



大清文宗協天翊運執中垂謨懋德振武聖孝淵恭端仁寬敏  
顯皇帝實錄卷之三十七

咸豐元年辛亥。秋七月乙酉朔。享

太廟。遣恭親王奕訢恭代行禮。○諭內閣。薩迎阿奏甘省營務  
廢弛。籌議責成提鎮。實力整頓等語。昨據琦善奏。番賊復出  
搶掠。已有旨。令該署督嚴飭鎮將。跟蹤勦捕。野番頻年肆搶。  
官兵前往追捕。未能得力。甚至退縮不前。總由該省營務廢  
弛已久。歷任總督粉飾消弭。以致養癰成患。實堪痛恨。番匪  
出沒深山。兵少則抗拒。兵多則逃竄。設卡巡防。嚴密偵探。最  
為要務。著即責成該提鎮。平日嚴督將弁。認真操練兵丁。飭

令防守弁兵。隨時確探。如有野番出掠。飛速傳報。該提督迅派將弁帶兵趕捕。該鎮即親帶弁兵馳往堵剿。必須立時加以懲創。使野番知畏。不敢輕出肆劫。並通飭地方文武查拏內地奸民。毋令勾結接應。以淨根株。薩迎阿現署總督。距裕奉到任。為日尚遙。恐秋間賊番復出劫掠滋事。著會同提督索文嚴飭各鎮。隨時認真防範。並將廢弛積習實力整頓。不准再蹈從前欺飾故智。致干重譴。儻將弁仍前玩泄。奉行不力。即著嚴參懲辦。○又諭張祥河奏查閱營伍情形一摺。陝西署鎮羌堡都司提標後營世襲雲騎尉馬斌。署延安營中軍守備鎮標右營世襲雲騎尉石懷寶。均箭射無準。才具平

庸。著一併革去隨營。仍留世職。署木瓜園堡守備鎮標右營世襲雲騎尉王國正。年力就衰。著以原品休致。○直隸總督訥爾經額奏遵駁定擬胡禿子罪名得旨。胡禿子雖非行竊罪人。第誑拏逞兇。情殊可惡。而該犯越獄脫逃。又在恩詔以前。若仍予絞決。顯與定章不符。若照例科以絞候。實不足蔽辜。應如何酌覈加重之處。著刑部議奏。尋奏擬絞監候。從重入於秋審情實辦理。從之。○鑄給廣西平南縣秦川鄉巡檢印信。從署巡撫勞崇光請也。○予甘肅陣亡把總趙勝祭葬世職。○丙戌諭內閣載銓等奏參玩視公事各員。請分別懲處一摺。京城八旗地面堆撥更房。分派兵丁輪班巡緝。理宜

倍加嚴密。茲據奏稱。查出鑲黃旗三固山空誤兵丁。竟有九十餘名之多。實屬玩視公事。所有鑲黃旗滿洲領班步軍校椿齡。阿克敦保。達郎阿。懷他那。富連。該班步軍校誠瑞。郭仁。郭伸保。雙喜。蒙古領班步軍校福成。懷塔布。該班步軍校莫爾根。漢軍領班步軍校蔡永盛。衡建忠。該班步軍校三音保。均著交部嚴加議處。該管之鑲黃旗滿洲署協尉永恰哈。蒙古協尉法保。漢軍協尉得福。均著交部議處。兼轄之左翼翼尉海福。副翼翼尉德祥。委翼翼尉富寬。一併交部察議。以示懲儆。○又諭。前據徐廣縉。葉名琛。許乃釗。奏南海縣西湖書院。暨東莞縣士子。因公項命案之嫌。聲言罷考。已降旨暫停考試。

茲據該督等奏稱。倡議罷考之人。多係刁徒藉端生事。其安分生監。不在其列等語。現在鄉闈伊邇。多士有志觀光。未便因一二刁健之徒。致阻良善進身之路。著照所請。所有西湖書院。及東莞一縣生監等。俱著准其一體鄉試。其倡議罷考之人。仍著嚴拏究辦。以示勸懲。○又諭。前據徐廣縉奏稱。已革右江鎮總兵惠慶。功多過少。當經降旨交賽尚阿確查。茲據查明。惠慶曾經打仗。有功無過。留心營務。行軍頗有紀律。賊入西林縣城時。正當該鎮在上林墟勦匪。地距數百里。鞭長莫及。並非託名防堵。延不赴援。惠慶著加恩賞給二品頂帶。以總兵候補。留於軍營。交賽尚阿差遣委用。以觀後效。○

又諭。現在徐廣縉前赴高廉一帶督辦軍務。所有廣東勦捕事宜。即著徐廣縉專辦。至廣西省亦係該督兼轄之區。其有交涉事件。著與賽尚阿互相知會。毋致兩歧。○諭軍機大臣等。賽尚阿奏。象州逆匪竄越東鄉新墟。連日追勦堵禦情形。並北流壯練殲擒多賊。各摺片清單。披覽均悉。該匪乘大軍尚未到齊。即由象州回竄東鄉。自係畏懼聲威。負嵎走險。第恐其南合凌十八等股匪。則黨與更眾。勦辦尤為棘手。該大臣密札桂平。平南。貴縣一帶。嚴防江口。並令候補知府劉繼祖。帶領水勇。防其偷渡。分遣巴清德。達洪阿。各帶官軍。兩路會赴潯州策應。諒烏蘭泰。向榮等。有此聲援。即可設法誘其

出巢。併力攻勦。務須前截後追。勿令勾結蔓延。現在新調官兵。計可全數抵粵。該大臣擬用全力。攻勦會匪大股。藉生力之兵。可期得手。以次分勦各路。並激勵團練。莫收實效。甚合機宜。應如何調遣防勦之處。朕亦不為遙制。此次賊匪竄回舊巢。究係分作幾股。仍須防其聲東擊西。誘我南向。乘虛北撲。致我兵又成尾追之勢。所查各文武稟報股匪九處。即著分飭在事員弁。度地相機。併力兜捕。早清一股賊匪。即早安一路生靈。想該大臣與朕同心。不煩諄諭也。惠慶。已明降諭旨。以總兵候補。其德亮。是否堪資任使。仍著隨時察看。據實具奏。本日又據徐廣縉等奏。高廉一帶賊匪竄擾。該督已於

六月二十六日。馳赴該處勦辦。已諭令該督專辦東省堵勒事宜。仍隨時咨報該大臣。並嚴防西省逸匪竄入。以冀勦力同心。肅清邊圉。將此由五百里諭知賽尚阿。並諭巴清德。達洪阿。烏蘭泰。向榮。知之。○又諭徐廣縉。葉名琛奏。遵查高廉賊匪情形。及曾大生股匪一摺。信宜縣賊首凌十八。奔竄兩省。肆行滋擾。急應嚴拏懲辦。毋任遠颺。署茂名縣知縣胡宗政。前聽紳耆之言。將凌十八之弟凌廿四保釋。現經該督等將胡宗政撤任訪查。務期徹底根究。毋任蒙混。其踞住安鵞之股匪何名科。屢經兩省夾攻。翦除黨與。並將其母女妻子。生擒解省。惟何名科現在逃往何處。仍著嚴飭緝拏。務獲。現

在徐廣縉前赴高廉一帶督辦軍務。葉名琛留省辦理文武鄉試。所見甚是。葉名琛於鄉試事竣後。仍著駐省就近調度。將此由四百里諭令知之。○欽差大臣大學士賽尚阿奏報粵匪情形。並請寬期勦辦。得旨。卿之調度。甚合機宜。殊堪嘉尚。朕心已深慰矣。俟新兵到齊。從容妥辦。汝之性情稍急。身體須加意保重。至應何處添調。何處防勦。朕亦不為遙制。卿之忠悃。朕鑒之。亦天下所共知者。○以追勦廣西東鄉新墟賊匪獲勝。賞還提督向榮花翎。主簿陳登仕藍翎。餘升擢有差。予陣亡把總程步津。任萬年。外委奚義鴻。祭葬世職。○丁亥。

上詣

壽康宮問

皇貴太妃安。○諭內閣。端華等奏。參奏事處領班御前侍衛聯順。行走常有遲誤等語。聯順不以公事為重。行走常有遲誤。甚屬非是。著革去奏事處領班。交部議處。○又諭。鄒鳴鶴奏。遵查廣西省。道光三十年實欠在民錢糧。懇請豁免等語。廣西省被賊擾累。節經降旨加恩。期與吾民休息。何忍更事追呼。所有道光三十年民欠地丁錢糧。著該撫查明確數。開單具奏。准其豁免。其前請緩徵案內。聲明照常徵收之三十年。應徵本折米石官穀。並著查明。如有輸將拮据之處。據實具

奏。准其一體豁免。以紓民力。該撫即刊刻謄黃。先行曉諭。俾邊圉窮黎。豫知朝廷德意。用慰朕念。○戊子。諭內閣。裕泰奏。福建省現辦保甲章程。參酌變通。開單呈覽一摺。保甲為弭盜良法。閩省山海交錯。民貧地瘠。盜賊滋多。現在漳泉會匪甫經懲治。尤宜力行保甲。以消奸宄。而安善良。惟立法尤貴得人。若地方官不能實力辦理。該管上司又不能實力稽查。必致良法徒託空言。且易起胥吏擾累等弊。著李芝昌。王懿德。於到任後。按照原擬章程。督飭所屬。認真妥辦。務期漸收實效。不至仍前廢弛。儻或始勤終怠。日久視為具文。即著指名嚴參懲辦。○又諭。吳文鎔。喬用遷。奏參緝捕不力之文武

員弁一摺。貴州思州府屬蔴音塘地方賊匪。膽敢糾集多人。白晝強劫。輪姦放火。拒捕傷人。不法已極。該前署思州府告病知府朱逢莘。並不加意防範。現署思州府知府楊書魁。交卸八寨同知印務。遲延月餘。始行抵任。以致釀成巨案。均屬玩誤。朱逢莘。楊書魁。並分防思州汛右哨千總張鶴皋。著一併革職。留於地方協緝。兼轄之代辦玉屏汛守備事。左哨千總羅亨祿。著先行摘去頂帶。均勒限一箇月。將在逃各犯。全數弋獲。歸案訊究。倘逾限不獲。即著從嚴叅辦。○廣西巡撫鄒鳴鶴。奏報各屬情形。並議實行團練。得旨。團練之法。務收實效。盡心勉力為之。又奏請將調任臬司吳鼎昌。留署藩司。

俟軍務漸戢。飭赴本任。允之。○以光祿寺卿富呢雅杭阿。署順天府府尹。王慶雲。監臨順天鄉試。○緩徵奉天新民廳。歉收地畝額賦。○己丑。諭內閣。奕山。毓書。布彥泰。奏。遵議滿洲營添考烏槍。酌擬考驗章程。並綠營一律辦理一摺。據稱伊犁。烏魯木齊。兩處滿洲營兵丁。向係兼習烏槍。著即責成該將軍都統等。照舊教演。毋令日久生懈。其考驗官缺一節。前據兵部會同八旗都統。覈議具奏。業經降旨。各駐防旗員來京考驗。加看烏槍之處。毋庸置議。該將軍所請協領等員。由部考驗。烏槍未能合式。即令暫回升任。停其升轉保舉。勒限勤習。未免事涉紛繁。著仍遵前旨。務循舊制。不必另議更張。



至伊犁所屬之錫伯索倫察哈爾額魯特四愛曼或專習騎射。或向習杈子槍。若令改其素習。轉非用其所長。所見甚是。亦著仍循舊章辦理。至伊犁烏魯木齊所屬之綠營各員。送部考驗。與旗營事同一律。均著毋庸另議章程。另片奏伊犁滿洲營籌款添造槍礮。伊犁鎮標捐造擡礮長矛等件。請免造冊報銷。及歲需操演鉛丸火藥。請照例報銷等語。俱著照所擬辦理。○貴州古州鎮總兵官雙福奏謝伊子德隆授廕生恩。得旨。汝之才具好。心地明白。但不可搪官差。說官話。狂於積習。因循不振。清字是居官第一要務。須識得破。認得真。方於己身有濟。此數語。汝切誌之。不可忘。至防堵事宜。盡心

辦理。方為不負委任。○改鑄江蘇陽湖縣知縣印信。從巡撫楊文定請也。○賑福建澎湖廳被風災民。○庚寅。

上詣

壽康宮。問

皇貴太妃安。○諭內閣。前因南糧到橋抽驗。米多潮溼。降旨令慶祺等查明坐糧廳是否認真查驗。茲據奏稱。該廳員逐日驗米。尚屬認真。並無蒙混之處。惟未能嚴禁經紀。驗後攙和舞弊。究屬疏於防範。坐糧廳毓鍾。俞樹風。均著交部議處。○又諭。給事中焦友麟奏。吏治因循。亟宜綜覈名實一摺。各省大吏。有察吏安民之責。即如緝捕一端。已屢經申諭。力求整

頓之方。若如該給事中所奏。近來四川之囑匪。河南之擒匪。湖南之齋匪。湖北之痞匪。以及山東兗沂曹。安徽廬鳳。潁地。方匪徒結黨成羣。幾於所在皆有。若不力加搜捕。何以除莠安良。著該督撫等。各飭所屬文武。嚴密查拏。以期消患未形。毋得因循坐誤。並著於年終。將特旨交辦事件。並拏獲盜案。除辦結外。其未完若干案。分晰開單。並將現辦情形具奏。以備查覈。至於辦事之遲速。獲案之多寡。即可驗屬吏之勤惰。該督撫等。如果表率有方。吏治必有起色。奸宄何至潛蹤。斷不可仍前玩泄。自蹈愆尤。負朕諄諄訓誡之意也。將此通諭知之。○又諭。御史雷維翰奏。吏治疲亂。訐告成風。請申明舊

例一摺。近來各省被劾人員。往往投遞呈詞。藉端挾制。訐告之案。層見疊出。如被劾之員。果有冤抑。原許其據實申訴。若於被劾本案之外。摭拾別項款蹟。砌詞聳聽。顯係懷挾私仇。藉圖報復。而該管上司等。恐被訐告。遂多徇隱。或於開缺之後。始行糾參。或於已參之後。復為消弭。以致刁劣屬員。肆無忌憚。尚安望其整飭官方耶。嗣後如有被參人員。以不干己事。訐告上司。以圖報復者。內外問刑衙門。著照定例。立案不行。仍分別治罪。以杜挾制。各省督撫以下。凡有表率之責者。如果各勵廉隅。奉公守法。自立於無過之地。俾該屬員無瑕可指。亦何致啟反噬之漸。惟當激發天良。潔己率屬。不可因

豫防挾制。隱忍姑容。亦不得因有立案不行之條。特為無人發覆。遂不自加檢束也。至各省遇有特旨查辦之案。均應徹底根究。迅速清釐。毋得迴護遷就。轉致稽延。庶大法小廉。而劣員亦知所懲儆。於吏治人心。均有裨益。將此通諭知之。○諭軍機大臣等。有人奏。湖南善化縣知縣易學超。貪婪不法。上年勸捐辦賑。捏稱賠累。勒令各鋪戶。再行捐銀。以肥私橐。其門丁張福。蠹役王洲等。逐案詐贓。開設錢店。之吳姓。因案逃走。該縣即將其店中所存銀錢金器。帶歸衙署。將店改易名號。自行開設。張福又唆使窩倡之李氏。控告書吏侵漁。案牽王姓。因即濫押得贓。該縣於城中酒館。蓋造戲臺。時往聽

戲。以致邑民相率效尤。巴陵縣知縣王逢吉。用土棍萬五為門丁。因吞蝕賑銀被控。經巡撫將該縣撤任。萬五傳訊收禁。查抄。該縣蒙稟署臬司刪改供詞。意圖掩飾。平江縣知縣張宗世。遇案索費。私設非刑。其所索之費。係其父及其胞兄親收。前年因事赴鄉。被民人糾眾毆打。狼狽歸署。不敢上稟。安化縣典史潘姓。與已赦軍犯王吉明。開設小押。訛詐鄉愚。該邑蠹役熊陞等。均有綽號。倚勢虐民。知縣徇隱不究。各等情。著程喬采。按照所奏各款蹟。逐一訪查。務得確情。從嚴叅辦。毋得稍有不實不盡。以儆官邪。原奏著鈔給閱看。將此諭令知之。○以翰林院修撰張之萬。為河南鄉試正考官。工部員

外郎文格為副考官。署吏部左侍郎德興為山東鄉試正考官。翰林院編修邊浴禮為副考官。國子監司業史瀉為山西鄉試正考官。戶部郎中杜學禮為副考官。○補行道先三十年大計。江西省卓異官十一員。才力不及官一員。年老官五員。有疾官一員。分別議敘處分如例。○辛卯。浙江學政吳鍾駿。奏稱甯波府城。諸夷雜處。左道易惑。現飭各學教官。於鄉鎮中勸立義學。以正人心。報聞。○以戶部右侍郎禧恩。署正紅旗漢軍副都統。○命候補總兵官長壽。馳赴廣西軍營。聽候欽差大臣賽尚阿差委。○壬辰。諭內閣。駱秉章奏。請將被控浮收錢糧之知縣。暫行革職一摺。湖南澁浦縣知縣薛超

文。經該管知府。以該員官聲平常。輿情不協。現被紳士呈控。該縣有浮收錢糧。勒幫採買。派捐兵差等情。具稟。自應嚴切根究。薛超文。著暫行革職。交該撫提同人證。嚴行審訊。務得確情。按律懲辦。○又諭。駱秉章奏。請將玩視軍餉之知縣。交部議處等語。湖南湘陰縣知縣劉松嶺。於兵餉過境。並不照例撥給兵役。又不嚴加約束。致令人夫中途逃散。經該委員雇夫前進。始抵長沙。實屬玩泄。署湖南綏甯縣知縣試用知縣范邦楸。領解靖州兵勇口糧等項銀兩。耽延十日之久。始行啟程。亦屬疲玩。劉松嶺。范邦楸。均著交部議處。○諭軍機大臣等。據駱秉章奏。接據賽尚阿移咨湖北漢陽府屬士民

程瑞凱等呈請捐貲助餉。代已革發往新疆之前任湖南長  
寶道楊炳堃贖罪。並請飭赴廣西軍營效力等語。已革發遣  
道員楊炳堃。前在漢陽府知府任內。是否實在恤民愛士。除  
秀安良。著有善政實蹟。該士民程瑞凱等所具呈詞。公捐銀  
兩。果否實心愛戴。樂於捐助。抑係該革員授意飾詞。著程喬  
采。詳加訪察。據實具奏。毋稍徇隱。原摺鈔給閱看。將此諭令  
知之。○以刑部左侍郎全慶兼署吏部左侍郎。○以正白旗  
蒙古副都統定福署正白旗滿洲副都統。○癸巳。

上詣

壽康宮問

皇貴太妃安。○諭內閣。徐廣縉奏參營員世職一摺。廣東三江  
協中軍都司線得智與世襲雲騎尉彭世勵。夥運私鹽。經地  
方官訪獲看管。輒敢縱令脫逃。迨經該督委員審訊。該員弁  
等堅不供認。顯係恃符狡展。線得智彭世勵著一併革職。交  
該督嚴審確情。按律懲辦。○諭軍機大臣等。昨據駱秉章奏  
查探兩粵賊蹤。及防堵情形。據稱廣西賀縣賊匪。竄回懷集  
縣大竹埔。與湖南江華縣濠界毗連。廣東賊匪分竄樂昌縣  
平石市。及陽山縣白虎墟。亦與湖南宜章臨武二縣鄰近。業  
經該提鎮添兵協堵。並飭各該營縣雇募勇壯。一律嚴防。本  
日據吳文鎔張亮基奏粵西賊匪竄入滇省廣南府境。當經

寶金卷三十一  
三十一  
升兵練勇。勦殺多名。餘匪潰散。滇省既有粵匪竄擾。湖南毗連處所。尤為喫重。前有旨令程喬采。馳往湖南防勦。著即會同該撫。嚴飭地方文武。於楚粵交界要隘。分投防堵。不得以兩粵逸匪。距境稍遠。遂形疏懈。儻防堵不嚴。致賊匪乘間竄入楚境。句結蔓延。惟該督撫是問。將此諭令知之。○又諭。吳文鎔。張亮基。奏粵匪竄入滇省廣南府境。經兵練勦捕潰逃。現在添兵防堵一摺。雲南廣南府。三面界連粵西。先經該督撫飭屬嚴防。四月下旬。有西林縣賊匪二百餘人。竄至距府城一百五十里之者孟。上下兩寨地方滋擾。當經兵勇勦捕。格斃十八名。生擒五名。餘匪潰逃。仍竄回西林縣境。據稱地方居民。尚未被其蹂躪。但滇粵犬牙相錯。必須嚴加堵截。方不致越境蔓延。該督撫現已派員添兵防守。著即嚴飭地方文武。於交界要隘。實力查拏。毋稍疏忽。雲南既有粵匪竄擾。貴州各屬毗連處所。尤為喫重。並著喬用遷。於黔粵交界。一律嚴防。勿懈。其雲南邱北一帶夷曹之黑沙人。春間曾有竄入粵省邊界搶掠之事。著隨時嚴拏懲辦。勿令復出滋事。以杜句結。將此各諭令知之。○河東河道總督顏以燠。奏黃河水勢盛漲。兩岸工程平穩。得旨。妥為修防。毋稍疏懈。○修廣東巡洋師船。從總督徐廣縉等請也。○甲午。

孝懿仁皇后忌辰。遣官祭。

景陵○諭內閣本年八月初十日恭值

皇考宣宗成皇帝聖誕。朕御龍袍。龍褂。挂朝珠。虔詣

壽皇殿行禮。隨從人員。均著穿蟒袍。補服。挂朝珠。是日

慕陵饗殿殿門外。著派端華。敬謹行禮。○又諭。固慶。盛桂。奏。請

將發遣宗室。隨同巡查禁荒等語。著照所請。宗室奕紀。准其

隨同協領等官。前往各處周查禁荒。事竣後。不准代為乞恩。

○兩江總督陸建瀛。江南河道總督楊以增。奏。節交大暑。河

湖並漲。啟放壩河。修防平穩。得旨。實力修防。不可徒託空言。

查明墊卸石工。速行具奏。以慰朕懷。卿等果能克勤克敬。則

億萬生靈蒙福矣。勉之望之。○乙未。諭內閣。戶部錢法堂。奏。

滇銅運解遲延。已酉未到三運。或甫入東境。或甫抵清江。庚

戌六運。均無確信。恐緩不濟急等語。銅運攸關鼓鑄。似此節

節耽延。必致遲逾貽誤。疊經降旨飭催。仍著沿途各督撫。及

派出之藩臬各員。並河漕各總督。不分畛域。一體飭屬嚴催。

務令趕緊運京。以資鼓鑄。毋任遲延。儻各該運員任意逗遛。

或沿途地方官不能實力催趲。即著指名嚴叅懲辦。○又諭。

刑部奏。審訊漕糧到橋。潮溼發塊一案。所有揚州二幫。現在

收存號房米石。著倉場侍郎。飭令趕緊分別挑晾。免致黴變。

並著會同抽查漕糧御史。將此項米石。詳細查覈。每經紀名

下潮溼米若干石。結塊米若干石。挑晾後。除尚堪食用外。每

寶錄卷三十七  
人實虧米若干石。分晰奏明報部。其未經到部之經紀二十一名。即著迅速解交刑部歸案審辦。○又諭程喬采。龔裕奏。省會城垣。現多坍塌。請責成承辦之員。賠修一摺。湖北武昌府城垣。於道光二十九年商捐興修。三十年六月工竣。迄今未及一年。坍塌。竟至二百八十餘丈之多。著飭令該藩司先行籌款趕辦。暫資保衛。俟秋後再行勘估興修。至此段城工。係已革同知勞光泰。與竹谿縣告病知縣馬銓。承辦。著責令該革員等。將工料銀兩。照數賠繳。毋任延宕。○又諭程喬采。奏。約束不嚴之帶兵各官一摺。湖北提標左營遊擊珠爾松阿。管帶兵丁赴粵。自應認真彈壓。乃先一日啟

行。致兵丁漫無紀律。行至澧州安鄉縣境內。輒敢於支給鹽糧外。訛索各費。滋鬧喧。該遊擊珠爾松阿。擅離隊伍。實屬膽玩。著摘去頂帶。仍令戴罪前赴軍營效力。千總吳必海。於所帶兵丁滋事。不行阻止。顯係有心徇縱。著即革職解往湖南。交該省藩臬兩司。提集該州縣。辦差丁役。質訊懲辦。此外帶兵各弁。有無隨同徇縱。並著查明懲處。其統領之宜昌鎮總兵阿勒經阿。未能先事豫防。亦難辭咎。著俟定案時。聲明請旨。○又諭程喬采。龔裕奏。請將疏防盜案之文武員弁。摘去頂帶。勒限嚴緝一摺。湖北江陵縣沙市地方。盜匪多人。執持刀械。一夜連劫三家。並拒傷事主鋪夥。及營弁兵丁。至十

寶錄卷三十七



五人之多。實屬目無法紀。該管文武員弁。平日捕務廢弛。事後又未能獲犯。自應分別示懲。湖北江陵縣知縣俞昌烈。署江陵縣沙市巡檢陳長春。專汛荊州城守營右哨千總丁達璋。協防外委常輝廷。著一併摘去頂帶。勒限三箇月。嚴拏賊務。獲。儻逾限無獲。即著嚴叅懲辦。署荊州府通判施鏜。係有督捕之責。疏於防範。著交部先行議處。○丙申。

孝德皇后殯宮月祭。遣官行禮。○諭內閣。程禹采。龔裕奏。拏獲聚眾抗糧首要各犯。解省究辦。一摺。湖北通城縣刁徒王尚志等。聚眾抗糧。侮官毆差。經該督等派員往拏。猶敢負固不服。拒捕傷人。實屬目無法紀。現在首犯王尚志。並要犯王風

世等。均已就獲。必應嚴行訊究。以儆刁頑。著交龔裕。提同現獲各犯。嚴審確情。按律懲治。其未獲夥犯。仍著嚴拏務獲。歸案審辦。毋任一名漏網。○湖廣總督程禹采奏。密陳湖南會匪並地方情形。得旨。隨時密訪妥辦。○兩江總督陸建瀛等奏。請將蘇松太道麟桂。調署鹽道。得旨。朕看麟桂。貌有才而心實餒。著陸建瀛等。秉公查看。如於鹽道缺相宜。即密行奏聞。候朕簡調。若斷難將就。即露章奏。叅以為自顧身家者戒。又奏。嚴拒啡喃。哂求還天主堂。批。卿等處之。盡合機宜。俟辦竣覆奏可也。○緩徵山東曹嘉祥。二縣。並濟甯。臨清。二衛。被電災區。新舊額賦。○丁酉。

上詣

壽康宮問

皇貴太妃安。○諭內閣。兵部奏。遵議聯順處分等語。聯順係屢經獲咎。棄瑕錄用之員。不知感激圖報。任意懈弛。厥咎甚重。著將御前侍衛。正紅旗護軍統領。一併革去。在乾清門侍衛上行走。仍照部議罰俸一年。不准抵銷。以為玩誤公事者戒。○以鑲藍旗漢軍副都統哲爾經額。為正紅旗護軍統領。鑲白旗漢軍副都統多爾濟那木凱。署正白旗護軍統領。○戊戌。諭內閣。龔裕奏。湖北黃陂等州縣地方被淹。現飭查勘。分別覈辦等語。據稱湖北黃陂。孝感。應城。沔陽。公安。江夏。漢陽。

天門。江陵。蘄水。監利。武昌。枝江。京山。嘉魚。石首。荊門。當陽。大冶。蒲圻。二十州縣。因入夏後五六月間。大雨連旬。江漢湖河並漲。以致軍民田地被淹。又公安。江陵。監利。石首。四縣。民隄亦多漫缺。業經該督撫等。委員往勘。著即嚴飭該管道府。及委員認真查勘。被水人民。如何安輯。被淹田地。能否及早涸復。乘時補種。漫缺隄段。如何設法堵築。迅即查明具奏。分別辦理。以副朕軫念災區至意。○己亥。中元節。

上詣

奉先殿

壽皇殿行禮。○遣官祭

永陵。

福陵。

昭陵。

昭西陵。

孝陵。

孝東陵。

景陵。

奉陵。

奉東陵。

裕陵。

昌陵。○遣官祭

孝和睿皇后暫安寢殿。○遣官祭

宣宗成皇帝暫安寢殿。○遣官祭

孝穆成皇后

孝慎成皇后

孝全成皇后陵寢。○遣官祭

孝德皇后殯宮。○遣官祭

端慧皇太子園寢。○改鑄福建福清縣知縣印信。從總督裕泰請也。

大清文宗協天翊運執中垂謨懋德振武聖孝淵恭端仁寬敏  
顯皇帝實錄卷之三十七

